



2025-imut aningaasanut inatsisissatut siunnersuut.

(Aningaasaqarnermut Akileraartarnermullu Naalakkersuisoq)
(pingajussaaneerqarnera)

Naalakkersuisut akileraartarnermut aaqqiissusseqqiinertik akilerumangittuarsinnarpaat. Naalakkersuisut isumaqartuarsinnarput, akileraartarnermut aaqqissuusseqqineq aningaasalorsorneqarsinnaasoq nunatta karsiata sinneqartoortaanik kisimik atuinikkut. Taamaaliortoqarsinnaagaluarpormi, ilumut qulakkeersimagaanni, killeqanngitsumik sinneqartoortuortoqartussaasoq. Taannaluuna neriuut, Naalakkersuisut najummatserfigigaat.

Tassanili oqartariaqarpunga, aningaasaqarneq pitsanngortarlunilu ajortittarmat. Taamaattumillu piffissaq takkukkumaarpoq, nunatta karsiani sinneqartoortuortuorunnaarnissaq. Taava qanoriliortoqassava? Qasseriarujussuarlunga tamanna apequtigisareerpara, Naalakkersuisulli akiumangillat. Paasisitsiissutigisinnaavara, tamanna pippat, allatut ajornartumik tassani piffissami aningaasat mumittaarilluni ujarborneqartariaqalissapput. Imannak paasillugu, piaaraluni ajornartorsiutit kinguaariinnut tulliuuttunut atugassiissutiginnissaat toqqarneqartoq. Tamanna kusanaassaqaq isiginnaartuuffigalugu.

Tamannaluuna pissutaanerpaasoq, Demokraatit aningaasanut inatsisip isumaqatigiissutaanut peqataanissamut qujaannarnerannut. Aammali marluk pingaaruteqartunik peqquteqarpoq, isumaqatigiissummi peqataasinnaannginnitsinnut. Uani nassuiassavakka.

1. Aningaasaqarnikkut ajornartorsiutit angakkuarnikkut aaqqinneqarsinnaangillat

Siullermik Demokraatini isumaqanngilagut, aningaasaqarneq angakkuakkatut ittoq, angakkualaaginnarluni, kollegialiornissamut aningaasartuutit aningaasartuutitut naatsorsuutigineqarunnaarsinnaasut. Paatsiveerunnarpoq aammalumi angakkuarnertut taaneqarsinnaalluni.

Tassami imaammat, aningaasanut inatsisip aappassaaneernerata kingorna isumaqatiginninniutissat 84 millioner koruuninik amigartoortussatut aqqummiunneqarpoq. Tamanna pingajussaaneereernerani pisimagaluarpat, missigersuusiornermut inatsit unioqqutinneqarsimassagaluarpoq. Taamaaliortoqarsinnaanngilarmi soorunami. Uagut Inatsisartuni, nunamut inatsisiliortuuvugut taakkualu soorunami malissallutigit.

Kisiannili qinersisoqangajalerpoq naalakkersuisooqatigiillu partiit poortukkanik tunioraarusersimapput sipaangilluaasarlutillu. Taamaattumilluuna aamma, namminneerlutik akileraartarnermut aaqqissuusseqqiinertik akilerumangikkaat, akiligassarli kinguaassatsinnut tulliuuttunut ingerlateqqikkusunnerullugu. Taavami qanoriliorpat?



Tassa, angakkuallaataa aalajangerput, aningaasartuutit 181 millioner koruuninik nalilik Nuummi kollegialiornissamut atortussaq aningaasartuutit naatsorsuutigineqassanngitsoq. Imaalitsiamillu; angakkuarnertuut 100 millioner koruuninik agguassassaqaqaleriataarput taamaasillutik, missigersuusiornermut inatsit malissinnaanngorlugu.

Ila ukorsii; ingasatsiarpoq. Aningaasartuummi sulii attanneqarpoq, eqqoriarsiullu, sumut pissanersoq? Soorunami kinguaassatsinnut tulliuuttunut tussooq, akilereerunikku tassunga ilutigalugu aamma, Naalakkersuisut akileraartarnermut aqqissuusseqqinerat akilissagamikku. Demokraatit tungaanniit ersarissarusupparput, tamakku tulluannngitsumik allanngortiterinerik akuerineqarsinnaanattillu ajorluinnartut.

2. Akuerisinnaanngilarput meeqqat ilinniartitaanerlu sipaarniarfigineqarneri

Aappaattut Naalakkersuisut sipaarniarput ilaatigut meeqqanut ilinniartitaanermullu tunngasunit. Tamanna akuersarsinnaanngilarput. Aningaasaqarnermut inatsisissatut isumaqatigiisummi ersarissumik allassimavoq, pisassaqaarfik tamarmik assigiimmik sipaarniarfigineqassasut kommunit, peqqinnissaqarfik aammalu Aalisarnermut Piniarnermullu pisortaqaarfik pinnagit. Isumaqatigilluinnarparput, taakku sipaarniarfigineqassanngitsut.

Tassungali ilutigalugu ersarippoq, ingerlatsiviit allat tamarmik assigiimmik annertuumik sipaarniarnermik eqqorneqassasut. Tassanilu aamma pingaarutillit soorlu ilinniartitaaneq, meeqqanut tunngasut, isumaginninneq ilaalu ilanngullugit. Uani aamma eqqaamatigu, tamanna aatsaat pisariaqarsimammat Naalakkersuisut namminneerlutik akileraartarnermut aqqissuusseqqinnertik aningaasalersorusunngimmassuk.

Naggataatigullu oqassaanga, aningasanut inatsisissatut isumaqatigiisut pinngitsoorani pitsaasunik suliniutissamik imaqaqarmat, taperserusutatsinnik. Soorlu assersuutigalugu pineqarput meeqqat atuarfianni suliniutit, peqqinnissaqarfik aammalu Inuit Pisinnaatitaaffiit Siunnersuisoqatigiit nukittorsarnissaanut suliniutit. Aamma nuannaarutigaarput, amerlanerusunik aningaasaliisoqarmat timersornermut unammisartunut, timersornermut siammassissumut, timersornermut tamanoortumut aallarnisaanermullu. Takku oqaluserisagut aamma uagut isumaqatiginninniarnermut nassarsimavagut, aammattaarlu maani inersuarmi saqqummiussimallugit. Taakkunani suliniutit pitsaasuupput pisariaqarlutillu, aningaasartaali ajoraluartumik toqqaannartumik akisussaassuseqanngitsuuvoq akiligassarlu kinguaassatsinnut tulliuuttunut ingerlateqqiinnarneqarluni soorlu uani saqqummiutanni allakkiga.

Taamatut oqaaseqaateqarlunga nalunaarutigissavara, Demokraatit aningaasaqarnermut isumaqatigiisuttip avataani inissisimammat taamaattumillu aningaasanut inatsisissatut siunnersuummut tamarmiusumut AAP-imik taasisinnaanata.